

FASNACHT 2025



J. B.-CLIQUE SANTIANS Alti Garde

100 Joor bissig

E Aiterzahn in Aggzion
isch kai scheeni Sensazion
är zieht und schmärzt direggt ins Hirni iine
do hilft kai Pille und kai Gryne.
Scho vor em Doggter kunsch zem Schluss
däm Zahn goots numme guet wenn duss.
Schnäll haissts jetzt e Fachkraft z finde
wo dä Schmärz kaa unterbinde.

Friener bisch zem Baader oder Hängger gange
die hänn alli Wäärggzyyg, Hammer und Zange
zem mit Schtosse und mit Glemme
die Wurzle use em Aiter z stemme.
Doch die Zyte sinn verby
es ka jo gar nit andersch syy.
Gschpyrsch hütt e Schmärz, gosch zem Dentischt
was e anders Wort isch fyr Sadischt:
dä luegt ins Muul – sait, dä isch fuul
und bivor ass de kasch zämmezugge
hesch e neyi grossi Lugge.

Zahnarzt wirsch nit aifach soo
fir das muesch scho an d Uni goo
Dangg em Doggter Hockenjos
stoot hytte an der Mattestross
e universitäre Bau
do mache si die Döggtter schlaue.
Sit 100 Joor, s isch nit zem Lache
versueche die us Studänte Döggtter z mache.
Ob mit Erfolg, das merggt am Änd
dr schwaissbadeti Paziänt.
Aber nai, so isch das friener gsy
hitte kaas numme besser syy.
Mir Alte kenne do e Liedli singe
unseri Eltere hän uns miesse zem Schuelzahni bringe
dä isch mit dem Boorer uff d Löcher los
hät plombiert mit Amalgam – famos
und mir hänn fyr e baar Joorzähnt
mit Quecksilber im Kiefer gäähnt
irgendwenn kunnt dr Befund
Quecksilber im Kerper syg nit gsund.
Drum macht me das hütte nümm eso
hittigi Eltere sind eerlig froo
ass au sie scho hänn e Spange bikoo.
Jä, krummi Zähn sinn halt verhasst
wyl das so schlächt in e Selfi passt
und fyr spööteri Lugge gits akkurat
in jeder Gressi e Implantat.

Die Gschicht seesch bi unserem Zug ganz scheen
alli zaige iiri Waggis-Zähn
dr Vortrab, halt scho e weeneli ranzig
hett Zähn vo Nünzähvierezwanzig.
D Pfyffer sinn Zahn-Deifeli – alles klar
und bi de Dambuure isch s wunderbar
die laufe nämlich, ooni Gschiss
als Edelwaggis mit Supergebiss
und dr Dambuurmajor in voller Montur
isch medizinisch und musikalischi Leitfigur.
D Ladäärne zaigt d Entwigglig vo der Zahnhaikunscht
mir zaige do – ganz umesunscht
wie me Karies-Problem ka leese
vom Milchzahn bis zer Zahnprothese.

Häsch dr Zeedel bis do aane gläse
wirsch langsam schissig
wenn wärde die denn ändlich bissig?
d Antwort do druff isch sehr bequem
mir hänn aifach zvyyl Problem.
Wirfsch e Bligg in d Krisekische
seesch e ganzi Süsche-Lische
zem Bischpil z Basel:
Schuggerkrise, Hallebad, Fuessball-EM, ESC
d BVB faart nümm bi Schnee
und s Naturhistorisch schwimmt im Grundwassersee.
Vo Baustelle und Parggplätz
redisch au nümm gärn.
Drum luegsch emol – was lauft denn z Bärn?
Si sueche e neye Bundesroot
will d Viola zrugg ins Wallis goot
by gtschreggtem Haida-Wyy und Raclettechäs
luegt si zrugg uf s Chaos im VauBeeÄss
und villicht driff si dört bim Vino
no de Tschugger und dr Infantino
so isch das im Wallis, s isch fascht normal
wo de aaneluegsch gits e Skandal.
Wenn de dänn wotsch iber d Gränze uuse
paggt di ändgültig s naggti Gruuse!
D Schwoobe hänn Schulde fascht wie d Grieche
pletzlig sinn sie di arme Sieche.
Dr Macron duet me au nümm laike
d Franzose mechte lieber straike
und in Wien goots schwär in d Hoose
die koche e richtig bruuni Sosse:
Am beschte laufte no, goppaloni,
z Italie mit dr Meloni.
Im Räscht vo dr Wält isch es wirgglig toll
s Naareschiff isch richtig voll
und wenn de alles wotsch begryffe
fangsch am beschte a mit kiffe.
Oder besser, gang uff d Gass!
gniess die Fasnacht und vyl Spass

* * * * *

PS:
D Ladäärne-Uusstellig uff em Minschterplatz und d Waage- und
Reggwisyte-Uusstellig bi dr Kasäärne sin vom Määntig znacht bis
am Mittwoch demoorge!
Deert und an de 3 Verkaufsständ (CINS) in dr Stadt ka men au alli
Zeedel und Schnitzelbängg, d Blaggedde und dr Rädäbäng kaufe.



loose!